



Buna chatscha auta, ma tuttina dovri ina chatscha supplementara

■ (rtr) Las chatschadras ed ils chatschaders grischuns èn per gronda part cuntents cun la chatscha auta da quest onn. Quai grazia ad ina buna chatscha da tschiervs e chavriels ed ina chatscha mediocra da chamutschs. En tut en vegnids sajettads 10013 animals d'ungla. 203 chatschadras e 5305 chatschaders èn sa participads a la chatscha auta da quest onn. En tut han las chatschadras ed ils chatschaders grischuns sajettà 3937 (3226) tschiervs. Sco il chantun scriva è quai in bun resultat che sa resulta da la vegetaziun d'atun ch'era gia avanzada sco er d'in settember frestg cun diversas naviglias e numerusas mesiras en asils da chatscha. I dat dentant grondas differenzas regiunalas. En tscherts districts è

la chatscha stada buna, entant ch'enturn il Parc Naziunal Svizzer è il dumber da tschiervs sajettads plitost mediocher, scriva l'Uffizi chantunal da chatscha.

Il dumber da chavriels surpassa la media dals davos onns

En tut èn 3019 (2370) chavriels vegnids sajettads durant la chatscha auta. Dentant è il dischequilibrer quai che concerna la schlattaina grond. Uschia èn 1878 bucs chavriel vegnids sajettads e sulet 1141 chauras chavriel, quai che munta ina relaziun da 1:0,61.

Buna chatscha da chamutschs

En tut en 3044 (2986) chamutschs vegnids sajettads. Quest dumber sa mova en il sectur previs, scriva il chantun. En

pliras regiuns è vegni constatà in augment da la tschorvadad da chamutschs. Cun ina strategia precauta vul il chantun evitar in svilup negativ.

Per realisar il plan da chatscha dovri ina chatscha supplementara

Ils gronds effectivs da tschiervs fa necessaria ina chatscha supplementara en bleras regiuns en il Grischun. Surtut en il conturn dal Parc Naziunal Svizzer èsi necessari da far ina gronda chatscha speziala. 2923 chatschadras e chatschaders èn s'annunziads quest onn per la chatscha supplementara. Quai è il pli grond dumber d'annunziads insumma. L'onn passa aveva quai dà anc 2671 annunziads, scriva l'Uffizi da chatscha e pestga grischun.